



**C**Asparus in Franconia Orientali natus est ex nobili familia Aufffessorum. Is cum præclaro ingenio insignis esset, à pueris operam literis dedit, atque artium & linguarum rudimenta foeliciter percepit. Postea uerò literarum amore in Italiam profectus, Romæ aliquandiu uixit, atque præclaram sibi eruditionem comparauit. Cum autem is bonorum authorum desiderio plurimum teneretur, omnes ferè Italiæ Bibliothecas maxima diligentia perlustrauit, atque optima quæque propria manu descripsit. Tandem is in patriam redijt, atque in Rubei colli-  
 lis arce ad Vuismadum amnem supra Eberman-

stadium Episcopi Bambergensis oppidum habitauit, & sua doctrina & pietate illam regionem plurimum exornauit. Habuit is quoque fratrem Fridericum, qui & ipse literarum Mecœnas, Anno post reparatam salutem humanam millesimo quingentesimo quadragesimo quarto Abbas monasterij Michelsfeldensis electus fuit. Cum hoc modo Casparus suis uirtutibus omnibus innotuisset, & cunctis bonis gratus esset, fato fungitur, & tali Epitaphio exornatur.